

Decidì parolas ed undrà persunalitads

Radunanza da delegads da la pbd a Cuira

■ (anr/fa) 71 delegads da la pbd grischuna han ditg trais giadas na e duas giadas gea als projects da votaziun federals. Ultra da decider las parolas han els undrà **Eveline Widmer-Schlumpf e Hansjörg Hassler**.

Ina settantina da delegadas e delegads da la pbd grischuna eran preschents en l'hotel City West a Cuira per decider las parolas. Il president da la partida *Andreas Felix* ha deplorà ch'ins constateschia savens ina mancanza da curaschi civil. El ha appellà da surpender la responsabladad per quai ch'ins fettschia. «Quai vala er en la politica, igl è pli simpel da reclamar da maniera anonima da persunas a l'ur dad asilants che da s'engaschar politicamain en ses agen num.»



Ilis undrads **Hansjörg Hassler** (a san.) ed **Eveline Widmer-Schlumpf** ensemen cun il president da la pbd grischuna **Andreas Felix**.

Sustegn per la revisiun da la lescha d'asil

A l'iniziativa «Per ina finanziaziun gista dal traffic» ha decis la pbd chantunala cun 63 cunter ina vusch la parola NA. L'intent da spender tut las 1,5 milliardas francs l'onn entradas da la taglia d'iel mineral mo per las vias na saja betg in agir ch'ins possia respunsar, era la maioritad da l'avis. Unanimamain han ditg ils delegads GEA a la revisiun da la lescha d'asil. I saja mo uschia pussaivel cun agid da la consulenza giuridica d'accelerar las proceduras d'asil da maniera legala e pli favuravla, èsi vegnì ditg. Senza discussiun ha la radunanza da delegads prendì enconuschientscha da las parolas proponidas da la supprastanza da la partida: NA a l'iniziativa «Entrada da basa nuncundiziunada», NA er a l'iniziativa «Pro Service Public» e GEA a

la lescha revidida da la medischna da reproducziun.

Menziunà er ils scumbigls cun la pps nazionala

In punct impurtant da la delegada èn stadas era las undraziuns da l'anteriura cussegliera federala *Eveline Widmer-Schlumpf* e l'anteriur cusseglier nazional *Hansjörg Hassler*. 16 onns ha el represchentà il Grischun a Berna. La laudatio per Hassler ha tegnì sia collega *Brigitta Gadiant*: «El era ina persunalitad politica ch'è s'engaschada era durant il temp da las differenzas cun la partida nazionala da maniera quieta e cumpetenta surtut per ils interess dals territoris muntagnards e per l'agricultura.» Durant il temp a Berna s'ha el lachà udir cun 196 votums ed inol-



Brigitta Gadiant ha bunas regurdientschas da la collavuraziun cun ses collega en il cussegl nazional **Hansjörg Hassler**.

«Sai viver bain senza la politica»

Tge plascha il pli bain ad Eveline Widmer-Schlumpf ussa ch'ella nun è pli activs en la politica a Berna? E tge manca il pli ferm? «Il pli bain am plascha che jau poss ussa fixar sezza ils termins en mia agenda. Ussa hai jau dapli temp per mia famiglia e per noss amis», ha ditg l'anteriura cussegliera federala, «mancar mancan las bunas discussiuns cun collegas surtut er en il sector internaziunal. Jau hai gi bliers contacts e blieras occasiuns da schlargiar l'orizont. Era sche jau hai anc adina contact cun anteriurs collegas èsi daventà pli difficil dad organisar inscutters.»

trà 35 intervenziuns. «Hansjörg era in collega che respectava autras opiniuns e che ha defendì cun persvasiun ils interess da la pbd.» En sia laudatio per Eveline Widmer-Schlumpf che *Gieri Luzi* ha tegnì ha'l menziunà ultra da la gronda cumpetenza sco politichera chantunala e federala era ses esser: «Cun ella èsi simpel dad avair da far, ella è franca, ma nun offenda mai, nagin che discorra cun ella ha l'impressiun d'avair da far cun ina persuna dal magistrat.» A partir da l'onn 1994 eran durant quatter onns Widmer-Schlumpf e Luzi commembers dal cussegl grond a Cuira. «Cun blier temperament ed energia, cun in ferm

senn per la justia, adina orientada al tema e cun enconuschientschas fundadas fin en l'ultim tagl, uschia hai jau emprendì ad enconuscher ella», ha ditg *Gieri Luzi*, «ed uschia è ella restada.» Widmer-Schlumpf ch'era dapi l'onn 2008 commembra dal cussegl federal ha giavischà a la pbd grischuna success cun cuntinuar sin la via encaminada. «Nossa partida che sa numnava l'emprim ils Democrats grischuns, alura la pps chantunala ed uss la pbd grischuna n'è betg sa midada», ha ella menziunà, «quai ha fatg la pps svizra, davent da noss principis e programs fin ch'i nun existiva pli nagin numnader cuminaivel.»